



焦太史編輯國朝獻徵錄卷之七十目錄

太常寺

掌寺事尚書

劉岌

崔志端

田景賢

掌寺事侍郎

丁永中

卿

呂本

黃子澄

姚友直

夏景

吳節

孫賢

齊章

周詔

魏校

少卿

高遜志

廖昇

盧原質

陳贊

蹇英

林文

李璋

楊時

張衍瑞

潘府

郭維藩

李開先

周怡

傅霏

寺丞

張來儀

杜璟

袁珙

卿

南京太常寺

徐初

陳音

呂憲

方鵬

牛鳳

穆孔暉

少卿

鄭雍言

夏瑄

鄭環

劉稱

夏良勝

黃重

汪佃

王世懋

焦太史編輯國朝獻徵錄卷之七十

太子少保禮部尚書掌太常寺劉岌傳 實錄

劉岌字凌雲四川涪州人景泰甲戌進士授吏部驗

封主事遷郎中以憂去服闋改戶部二年仍補文選

公清勤慎時論與之累官太常卿禮部尚書掌寺事

久典秩祀練習儀章且容觀魁梧音吐鴻暢甚為

憲朝所眷注進太子少保以疾乞致仕不許岌自陳

世為戎籍勅兵部除其籍弘治己酉岌復以老請乃

賜馳驛并寶鑑以還仍命有司歲給夫廩家居凡十

七年而卒時弘治十八年八月計聞賜祭葬如例岌

平生謙謹亟稱人之善聞論人過失輒止之或面侮之亦不校初艱于立子官京師妾有生子者其妻妬而棄之道人爲收鞠至八歲乃復迎歸以爲子聞者以爲岌厚德之報云

禮部尚書掌太常寺事崔志端傳

實錄

崔志端順天宛平縣人由神樂觀道士克樂舞生成化壬辰授太常寺贊禮郎辛丑補寺丞壬寅補少卿弘治乙卯遷卿甲子進禮部尚書仍掌太常寺事具疏乞休致至再始允焉居觀中癸酉陳情優養特給夫米正德九年六月卒其孫序班承祖乞祭葬所司執奏以其發身雜流例不得濫與上不聽竟與祭一壇

太子太保禮部尚書掌太常寺田景賢傳

太子太保禮部尚書田景賢字宗儒順天府涿州人
成化乙未進士授戶科給事中陞通政使司右叅議
弘治辛亥陞太常寺少卿通政使尋陞禮部右侍郎
掌太常寺事正德戊辰陞禮部尚書掌寺事屢賜玉
帶及金織麒麟衣庚午加太子少保引年乞休疏志
上乃加太子太保賜璽書乘傳以歸命有司給月廩
歲隸正德十四年六月卒賜祭葬如制景賢體貌魁
岸音吐洪暢爲人淳實守官四十餘年廉謹如一日
晚年清潔寡欲人所罕及卒之日幾無以爲歛士論

稱之

禮部右侍郎掌光祿寺事艾福傳

實錄

禮部右侍郎艾福字天錫湖廣襄陽人天順四年進士授監察御史成化初巡按山西考覈官庶黜不職者九十人旌其能者七人審錄重辟有童年十三分盜贓米一釜憐其幼特請釋之遂用是起名三年復按浙江以父喪歸八年擢光祿寺少卿十三年陞卿凡典御膳及諸供應皆區畫有定十四年上疏請省異教供餼坐繫詔獄奪俸六月十九年擢禮部右侍郎仍掌寺事累上疏乞歸始命致仕家居八年以弘治五年七月卒年七十三計闡揚祭葬如例福爲人

通達習於世故頗傷輒熟晚在光祿爲近幸所侮不能堪累乞退避竟遂其志以去人亦以是多之

掌太常寺事禮部左侍郎丁永中傳 實錄

掌太常寺事禮部左侍郎丁永中大興縣人由神樂觀樂舞生選授太常寺贊禮郎歷陞協律郎寺丞少卿卿至禮部左侍郎仍掌寺事弘治三年言者劾令致仕至七年四月卒賜祭葬如例永中以黃冠厠薦紳列五十餘年生既獲封贈其父祖如已官卒仍獲沾三品寵卹之典視士夫著勳烈者無以異亦異事也

太常寺卿呂本傳

實錄

呂本鳳陽壽州人仕元爲元帥府都事其後來歸歲
丙午爲中書掾史吳元年授湖廣行省照磨洪武三
年陞中書省右司郎中四年改左司郎中五年陞刑
部侍郎尋進吏部尚書六年除太常寺卿七年以事
左遷北平按察司僉事尋召還授禮部尚書未幾出
爲兩浙都轉運益使十二年復授太常司卿至是以
疾卒賜葬鍾山之陰本無子其女爲 皇太子妃

太常卿黃公子澄傳

鄭曉

黃公子澄名湜以字行分宜人少受易歐陽貞書周
 與學春秋梁寅有文行負盛名洪武十七年貢入太
 學明年進士舉禮部第一授翰林編修陞修撰伴讀
 東宮累官至太常卿 建文君為太孫時坐東角門
 謂公曰諸王尊屬擁重兵柰何對曰諸王僅有護兵
 纒足自守萬一有變以六師臨之誰其能支漢七國
 非不强卒底亡滅小大強弱之勢不同而順逆之理
 異也 太孫喜每呼公黃先生 太孫即位倚任公
 謂曰先生無忘東角門之言公頓首應曰不敢遂出

與齊太議削奪諸王兵權未幾周王得罪 建文君

書諭 文皇 文皇為曲解公曰燕周母兄弟弟燕王

出塞有功威名日盛不併去燕後難圖於是出兵開

平諸鎮及更置北平守臣伺府中事日急靖難兵遂

起及耿炳文諸將相繼敗北 建文君召問公對曰

勝負兵家常事今天下富勝兵強食足區區一隅豈

能當天下全力聚兵五十萬四面並進旦夕且成擒

公遂薦李景隆為大將代炳文景隆尤昏懦戰輒敗

棄其帥遁召還京又赦不誅公慟哭曰景隆出師觀

望懷二心不亟誅何以謝祖宗厲將士練子寧亦執

景隆於朝且哭且數請誅之皆不聽江淮諸將

公拊膺慟哭曰大事去矣誤薦景隆萬死不足贖誤

國之罪賦詩云仗鉞曾登大將壇貂裘遠賜朔方寒

出師無律真兒戲負國全身獨汝安論將每時悲趙

括攘夷何日見齊桓尚方有劍憑誰借哭向蒼天幾

墮冠靖難兵至淮上 建文君不得已逐公密使募

兵而以竄齊黃使告燕 文皇曰此緩我也請悉召

吳傑平安盛庸師還即已 建文君為遣少卿薛嵩

請罷兵 文皇帝又不許兵抵江干蘇州知府姚善

言公文武才略又捍國難顧屏諸閑遠以快敵人胡

失計至此始急召公未至金川門失守 文皇執公
責問不服族其家一子走易姓名田經遇赦家湖廣
咸寧正德辛巳進士黃表其後也

太常寺卿姚友直傳

實錄

姚友直名益以字行淞江蕭山人洪武甲戌進士授
中書舍人累陞司經局洗馬永樂中 宣廟爲皇孫
時奉命授書并授斬獻王凡所顧問必以正對王以
賓禮待之未幾陞左春坊左庶子及滕王建國雲南
陞雲南左叅政掌長史事滕王薨因事至京 宣廟
嘉念舊勞擢太常寺卿正統三年正月卒遣官賜祭
命有司給舟車歸其喪營葬焉

太常寺卿夏景傳

太常寺卿夏景字仲昭直隸崑山縣人初姓朱名利
舉進士爲翰林院庶吉士 太宗嘗召見之謂曰太
陽麗天日宜加於永上利字宜作景字書有景字始
此既而景又自奏復其本姓爲夏以善書供事內省
嘗扈從兩京授中書舍人宣德中轉考功主事仍供
內直正統十年用薦者陞卿致仕年八十三卒時成
化六年八月計聞賜祭葬景既善書亦能詩精繪事
尤工墨竹以此得名于世爲人坦率樂易不拘小節
時出入禮法間人亦不甚非之晚年家居頗效楊蓆

夫之爲人以詩酒燕樂自娛云

太常寺卿兼翰林院侍讀學士吳節傳 實錄

吳節字與儉江西安福縣人宣德庚戌進士選爲翰林院庶吉士授編修秩滿陞侍讀景泰初陞南京國子祭酒滿九載加從三品祿 上初即位修 英廟實錄以節嘗預修 宣廟實錄知典故召爲副總裁既至改太常少卿兼侍讀學士書成進本寺卿兼官如故未幾丁母憂賜祭葬服除請闕謝恩遂乞致仕時年已七十餘既得請家居十餘年卒時成化十七年七月年八十五計聞遣官祭葬節爲人平易質直信人不疑爲文如其爲人初治春秋學與同學劉球

齊名又同入翰林學春秋者多師二人而節之徒尤
衆後進宗之安福春秋遂擅名于天下其爲祭酒承
陳敬宗之後敬宗師道嚴甚流爲寡恩節矯之以寬
士類悅服久之流于縱弛聲望不建敬宗云

太常寺卿兼翰林院侍讀學士孫賢傳

實錄

太常寺卿兼翰林院侍讀學士孫賢字舜卿河南杞
縣人景泰甲戌進士第一授翰林院修撰修寰宇通
志成陞侍講天順初改左春坊左中允侍

東宮講

讀 上即位進太常少卿兼翰林院侍讀修

英宗實

錄成進太常卿兼侍讀又進兼侍讀學士時成化庚
寅歲也逾年請立 皇子爲 皇太子且引疾乞致

仕以示無希覬意章並上 上皆允之皇子立是爲

悼恭太子賢回家憤憤不樂而難於言成化十三年
十一月卒年五十四計聞贈禮部左侍郎兼翰林院

學士命有司祭葬如例賢起諸生不十年至通顯然無大過人者性剛急或勸于艷然怒曰孰爲程朱孰爲韓柳護前忌才不能容物其輕于舉動尤爲人所哂云

通議大夫太常寺卿慎軒齊公章墓志銘

林瀚

公諱章應璧其字別號慎軒世家永平之灤州大父貴從文皇靖難授燕山左衛試百戶父安累並載功歷陞指揮僉事公雖生于將門自少篤志力學與伯兄文同領天順壬午鄉薦登成化丙戌進士己丑文亦第甲科官至戶部副郎人以二難稱之公初授戶科給事中甲午丁外艱服闋復除本科庚子進左給事中再進禮科都給事中壬寅轉鴻臚寺丞尋進少卿弘治庚戌太常卿缺員慎其選吏部以公薦

上簡任之凡郊廟祀典駿奔誠恪儀文節奏極詳
明 天子嘉其勞荐膺寶鏹之賜且予誥進階贈祖
父如其官祖母呂母郭並淑人公在太常幾六載寅
恭匪懈翊贊國家禮樂之功居多其在鴻臚傳玉音
達下情鏘鏗洪亮金玉相宣凡朝覲會同萬方聳聽
壯觀國威之功居多其在諫垣累抗章論列陳時政
得失以激直忤旨下詔獄人或危之公曰君仁臣直
吾忍負 聖明哉竟從寬貸聞者矐之謂得諫臣體
其氣節凜凜扶持國是之功居多嘗奉使冊秦晉二
宗藩禮成餽遺一無所受其謹於操持增重國體始
終蓋一致也惜乎天不永其年僅五十八而卒距其
生正統戊午七月二十三日也禮部以計聞 上震
悼遣官諭祭營葬域

太常寺卿贈禮部右侍郎長洲周公詔傳

顧璘

周詔者直隸長洲人也自少有氣節成化庚子登鄉試授嘉祥縣教諭九載考績入京時 睿宗皇帝方開府置屬遂與選為伴讀遷紀善詔以國事草創宜有典則以垂後世乃本祖訓及中庸九經之目為書數千言以獻 睿皇嘉之尋以憂去賜予甚厚復仕加長史俸詔感知遇因事納忠言多切直 睿皇喜書君子懷德及諸詩以賜之每見稱為先生而不名詔數請謝事不許乃以展墓乞歸其鄉及返國未至

而 睿皇崩詔匍匐奔泣如喪考妣事 今上益竭
心力每進講經史 上爲之竦聽扈駕入京師遷詹
事府少詹事兼翰林院侍讀將大用之居數月疾辭
轉太常寺卿遂卒於官 上聞惋惜贈禮部右侍郎
陽祭葬于璘廕中書舍人孫儒廕大學生

太常寺卿魏公校傳

魏校字子才蘇州崑山人弘治乙丑進士正德元年
丙寅授南京刑部雲南司主事遷陝西司員外郎廣
東司郎中每訊重囚齋居默念務期得情凡獄之寃
滯人所不能決者即片言決之會審監刑衆皆采衣
肉時闈宦劉瑾擅權其黨劉瑯守脩南京倚勢作威
臺省官望塵奔謁公獨不往瑯復夷視法司或時判
狀至莫有抗者惟公直行已志京邑有經歷姚元者
從子利其富貲誣以奸狀賄瑯陰爲之地必欲寘元

於死屬公訊之竟白其枉瑯亦莫敢誰何暇則與余
公子積夏公敦夫王公純甫講明聖賢之學正德九
年召爲兵部職方司郎中方江彬握重兵居大內而
寧藩亦有反謀遂移疾家居正德十六年辛巳今
上初服起公首膺廣東提學副使之命力以師道爲
已任崇德行畧文詞毀淫祠興社學禁火化厚人倫
厥功爲多尋憂居復補江西兵備改河南督學轉大
理寺少卿國子監祭酒太常寺卿公性孝友每夙興
即省其父母夜則就寢所晤語無恙乃即安或疾則
累晝夜目不交睫致政時母張老矣日依依侍食於
側平生篤志聖人真猶饑渴之於飲食其學主于立
本研幾由慎獨以通於性八而稽古以協于明誠始博
而終約者有大學指歸六書精蘊卒謚恭簡

太常寺少卿高遜志傳

高遜一作志字士敏直隸蕭縣人元末僑寓嘉興好

學嗜文嘗侍父宦遊吳中一時文章家如宣城貢師

泰鄱陽周伯琦遂昌鄭之佑俱客遊吳遜志皆獲受

業故其為文深醇雅則成一家言年二十五為鄒山

書院山長洪武二年徵修元史入翰林為編修累遷

侍講學士革朝庚辰會試禮部尚書陳迪侍中黃觀

知貢舉遜志以太常寺右少卿與董倫為考試官得

吉水王良常熟黃鉞莆田陳繼之廬陵胡廣崇仁吳

溥建安楊子榮新淦金幼孜石首楊溥武進胡濙太

康顧佐時稱得人同較藝者右拾遺朱逢吉編修史
 官吳勤葉惠仲趙友士徐旭一作景張秉彛監試御史
 王度俞士吉亦一時之選壬午之變王度葉惠仲死
 難餘順命顯庸遜志存沒無可攷見殆晦迹終身挺
 節不汙於時耶

太常寺少卿廖昇

忠節錄

廖昇湖廣襄陽人未詳其所以進學行最知名與方
 孝孺主紳輩友善洪武二十九年由左軍都督府斷
 事擢太常少卿建文初修

高皇寶錄昇與為纂修官昇博雅有才朗達負氣靖
 難兵渡江忠誠伯等自龍潭敗還昇聞之遂慟哭與
 家人訣自經死都御史陳瑛奏昇與黃觀王叔英周
 是修王良顏伯璫等皆不順天命效死建文此其存
 心與叛逆等並宜追戮以儆奸朋詔勿問

太常寺少卿盧原質

忠節錄

盧原質字希魯浙江寧海人母方氏孝孺之姑也原質於孝孺爲外兄而問學得之方門爲多洪武戊辰舉進士第二人授翰林編修歷太常少卿建文中多所建明靖難後召見不屈死之弟原朴論死族其家

太常寺少卿進階亞中大夫陳公贄墓志銘

太常少卿陳公致政之七年以疾卒于家其子通政
司右通政嘉猷奔喪有期乃以編修鄭君之狀來請
銘公姓陳諱贄字惟成別號蒙軒世爲餘姚人宋咸
淳中有兄弟同舉進士者曰應庚曰龍榮應庚即公
六世祖也曾祖俊民元上虞縣學教諭祖達道隱居
不仕父性善仕國朝官至刑部吏曹即中母馬氏繼
卓氏公幼穎悟不比稍長從鄉先生宋公傳張天民
學博極經史期以策名科第作懷二都賦以見志已
而再試有司不偶輒棄去用杭州府知府盧玉潤薦

爲儒學訓導嚴立條約啟迪有方門弟子出爲顯官者十餘人浙江左布政使黃澤雅重公文行金石制作必以屬公宣德乙卯纂修 宣廟實錄天下郡國當會萃事蹟以上而兩浙十一郡之事公實總之時稱有史才明年滿考起京簡任翰林待詔授中使書于內館諸生薰其教化成才者衆秩滿陞典籍尋遷五經博士未踰年以學士高公穀薦陞廣東布政司左叅議時廣寇黃蕭養之亂甫平公撫摩凋瘵極盡仁恤訪鰥寡幼穉之被掠賣者以還其家瘞兵死遺骸親爲文祭之以憫其不幸聞者感悅其他善政宜民者槩類此廣民至今思之不忘景泰癸酉遷太常少卿以儒相祀輿論稱愜天順丁丑疏乞致仕不許尋蒙 賜誥進中憲大夫有清慎端重之褒贈父如其官二母皆恭人越三年再請始得休致時年六十有八矣適其子嘉猷有使滿刺加國之命因便道奉公至杭以別墅在西湖之側遂留家焉先是浙中名卿大夫致仕家居者六七公南京吏部尚書魏公驥其一也聞公歸皆來會喜相謂曰歸老之榮皆 上賜也乃約月一集爲恩榮會會必賦詩爲樂蓋不減洛下風致云公每遇良辰輒偕從弟致仕知縣賓及

騷人墨士遊玩于湖山間其別墅中亭堂以十數皆
勝處可樂也客至必命酒投壺徜徉竟日鄉人羨慕
之目爲神仙中人天順甲申 詔進階亞中大夫成
化丙戌三月三日即世距其生洪武壬申閏十二月
六月春秋七十有五臨終神思清明謂次子嘉瑞曰
吾家受 國恩三世矣其語爾兄勉力以圖報稱語
不及他公性資凝重心地坦夷平居寡言笑而和厚
之氣藹然可掬早喪父家雖約而能竭力襄大事以
禮事繼母能盡其孝處諸從兄弟極友愛教育從子
無異己子居官三十餘年以勤慎自勵所至著聲
稱平生工詩文古選遍陶柳近體駸駸乎盛唐書法
頗得晉人筆意所著有自娛藁容臺藁薇垣藁撫安
錄歸田藁凡若干卷藏于家其和陶詩唐音及西湖
百詠梓行于世

太常寺少卿蹇公英墓志銘

周洪謨

公諱英字伯榮號蹇氏重慶巴縣人太師忠定公冢
子仁孝淳謹太師寵冠群臣名震天下而公日侍側
親賢友仁劬劬然如寒家子畧不有倨傲態衣服飲
食悉從儉約在南京時鄰居伏侍郎之隸卒疽發背
委諸途公見而憐之爲求劉郤醫治得不死嘗遊句
容寓崇明寺寺有中官一僕亦發疽弗治以待斃公
爲延醫士張榮療之而愈永樂甲辰母劉夫人歿時
忠定公扈從鑿輦行在所來請治喪命至高郵湖暴
風壞舟舟人皆失色公籲天曰英平生不敢爲悖理

事是行特請父命治母喪天如憫之尚貸其死少頃
舟漂至中州而止後扶柩歸權殯蒲坦公廬殯側時
久旱公爲文率父老禱於神時雨乃降禾乃登既免
喪上驛召來侍忠定所及忠定公薨哀毀踰制尋
授尚寶司丞以歸舟次江表風雨大至俄有覆舟順
流而下公急遣家僮以艇救之活男婦七人居繼母
喪不異所自出正統戊午服闋復職己巳扈從北征
明年庚午進本司卿一日朝廷行大婚禮先期禮部
失請寶璽之捧及期衆皆曰倉卒不可復請公恐禮
部重得罪力請捧之以成禮天順己卯進太常少卿

辛巳秋公患肺疾劇醫弗効一夕夢神人告曰勿憂
吾爲汝增福壽矣疾果愈上疏請老詔不允甲申復
疏懇請始獲命成化元年春治裝歸次南京疾復作
遂以是年冬十二月二十三日卒於都城內故第之
正寢年七十四計聞上遣官致祭公前後居官凡
三十年受勅者一受誥者再其詞有和厚明敏之褒
又曰持身端謹蒞事勞勤又曰茂修不懈清譽彌彰
平居喜讀書凡經籍子史及九流百氏靡不力購克
乎其室好吟詠所著有草亭集寓懷稿晚年人饋石
假山文如壽字因自號壽山老人配馮氏始久無子

忠定公請楊文貞公製詞禱於神樂觀齋沐往禱夢
有人語以道士寫祈文有誤視之果然遂生二子長
曰霖中書舍人次曰霈既官而卒

太常寺少卿兼翰林院侍讀學士林文傳實錄

林文字恒簡福建莆田縣人宣德庚戌進士及第除
翰林院編修正統初與修 宣廟實錄成陞修撰兩
為會試考官景泰中歷陞左春坊左諭德兼修撰進
左庶子兼侍講預修寰宇通志天順初以景泰中東
宮官改尚寶司卿仍兼侍講尋轉翰林學士 上在
東宮文與講讀屢引年 英廟重其人不許 上即
位褒進舊學之臣陞太常少卿兼翰林院侍讀學士越
月懇乞致仕歸成化十二年六月卒于家年八十餘
贈禮部左侍郎遣官諭祭命有司治葬事官其子載

爲中書舍人文性謹畏平生未嘗疾言遽色與物無
競與人交久而益親爲詩文不尚竒詭人稱爲長者
云

太常寺少卿李公璋墓表

徐溥

故少保吏部尚書兼華蓋殿大學士贈太師李文達
公有賢子諱璋字士欽仕至太常寺少卿年四十有
九弘治丁巳七月二十五日卒于京師之賜第君文
達長子母曰周夫人幼則莊重好學文達嘗誨以學
貴通古今務踐履勿爲近世舉子業故君兄弟不事
場屋進取英宗嘗命中書人詣文達家以子名來上
將錄用之文達辭曰臣子璋幼方就學何敢冒寵
英宗嘉嘆而罷及文達薨憲宗即喪中特旨命君
爲尚寶司丞君歸襄事而周夫人繼卒君時年十八

與持家內外斬斬服闋乃蒞職戊戌進本司少
卿辛丑進卿九歲考績進太常少卿上疏請革濫祠
清丁役增樂舞謹在事詔議行之丙辰冬有事天壽
山以勞瘁感寒疾嘔血而卒上遣官諭祭命錫中書
科書誥出身則猶以文達故也君雖以蔭官而力學
修行不懈嘗考吏部冢宰三原王公以管仲子產孰
優論君援筆立就文義粲然王公嘆曰此豈可以任
子例視哉其在尚寶嘗持節冊封代府楚府弘治初
遣祭嵩嶽及唐鄧二府在太常又奉詔祀濟瀆將命
從事既慎且恪餽遺禮幣一切謝却居家友愛備至
處諸父兄弟有人所難能者嘗於宅旁作園池藝花
竹暇則與賓客觴咏其中所交皆一時名士於乎文
達之勲業在國史固宜有後焉而君之賢又能世其
家然位與年皆不滿德也縉紳士大夫多惋惜焉

太常寺少卿兼翰林院侍講學士楊時暢

太常寺少卿兼翰林院侍講學士楊時暢字知休陝西咸寧縣人太子少保戶部尚書鼎之子也成化戊戌進士改翰林院庶吉士授檢討弘治初與修

廟實錄書成陞修撰未幾克經筵講官同考禮部會

試詔選 東宮官屬吏部尚書馬文昇以時暢薦改

右春坊右贊善秩滿陞左春坊左諭德會典成再遷

侍講學士正德改元以 東宮講讀恩陞太常寺少

卿仍兼侍講學士尋卒時暢美風儀善談論居家以

孝友聞爲大臣子多識國朝典故及前輩遺事有幹

濟才未及用而卒

太常寺少卿張衍瑞傳

朱睦㮮

張衍瑞字元承河南汲縣人也祖杰監察御史父繼湖廣左叅政衍瑞舉弘治十八年進士明年爲正德改元授清豐知縣以勘事執法爲逆瑾所惡矯旨下詔獄楚毒備嘗瀕於死者數矣瑾誅赦出歷陞吏部文選司郎中十四年 毅皇自榆林還復欲南狩時寧藩蓄逆上下以爲憂大臣科道交疏留不聽江彬輩又從與詔以三月壬子駕出行瑞曰即畏罪不言寧不爲宗廟朝廷慮乎乃抗疏率同官六七輩赴闕上之大畧言巡游費財動衆寓縣騷然而隱憂伏禍

且不可測 上不許明日諸曹屬各又上疏諫前後百有七人詞益亟切 上怒罰跽門五日而京師忽風霾晝晦 海子水溢高四尺許橋下七鐵柱折有金吾衛指揮張英者以是為變之明驗乃肉袒戟刃于曾以死諫 上大驚詔諸言事者各杖三十倡之者謫外行瑞得平陽府同知 今上即位召復原秩尋擢太常寺少卿踰年卒於是言官疏行瑞負性忠直兩遭困厄宜加褒恤以勵臣工詔可贈太僕寺卿仍賜祭葬廕子先是行瑞同邑人劉珏以貢士任刑部照磨亦以諫止南巡杖卒贈刑部主事

太常寺少卿潘府傳

實錄

太常寺少卿潘府 澗江上虞人以進士仕至提學副使乞終養遂不起後以薦陞太僕寺少卿改太常寺少卿致仕嘉靖五年六月癸酉卒府性至孝嘗疏請行三年之喪又上聖學淵源中興治要諸疏居家有萬行好著述鄉評重之巡按御史潘倣為請乞祭葬禮部復言四品文臣例有祭無葬 上以府孝行可嘉特令有司量與營葬

太常寺少卿兼翰林院侍讀學士郭維藩傳

太常寺少卿兼翰林院侍讀學士郭維藩河南儀封縣人正德六年進士改翰林院庶吉士除檢討陞南京國子監司業翰林院侍講學士管南京翰林院事歷七載召還以原職管理誥勅克經筵講官尋改侍讀學士已充講大學衍義官纂修 列聖御製文集克管錄官擢今官嘉靖十六年十月卒 上念其謹讀勞特恩賜祭葬維藩敦朴孝友鄉人稱之

翰林院提督四夷館太常少卿李開先墓志銘

殷士儋

嘉靖初文治恬熙群良彙進于時仕于中朝者有八才子稱中麓李公其一也公以隆慶二年二月望卒于家嗣子幼弱里中無賴稍稍齟齬之而一二有司復持之急以故不克襄事者數年至是始議以壬申某月日葬公綠原村祖塋前期嗣子持狀來請銘余曰公吾邦之良也銘惡可辭按狀公名開先字伯華中麓其別號也先本伯陽之裔居隴西者最著其後始自隴西徙長城嶺又自長城嶺徙綠原村于是遂

為章丘人數傳有名子瞻者公會大父也子瞻生聰
皆邑諸生聰生淳正德庚午舉于鄉娶于王而生公
以公貴累贈奉直大夫吏部驗封員外郎王累封太
宜人公舉嘉靖戊子山東鄉試第二人明年成進士
授戶部雲南司主事久之調吏部考功歷稽勲驗封
員外郎郎中已又改文選尋擢太常寺少卿提督四
夷館居無何罷歸蓋家居者二十年而卒公生而卓
犖穎異七歲善屬文讀書一見輒成誦而又即知聲
律吟咏之學稍長補博士弟子員里中有繇役苦公
公自言于令令面試大奇之為復其家于是齊魯章

縫之士咸喟喟推轂李生矣未幾贈公捐館舍公哀
毀盡禮已又喪其祖母公持服如贈公鄉人稱之服
除連舉進士嘗運餉金詣寧夏當是時關中有兩大
史康公海王公九思家在武功鄠社之間公業聞兩
公名及使還過訪之此兩公者居以才自雄睥睨一
世乃見公獨懽然相得為留數日始別復移書唐太
宰薦之抵家以疾在告者踰年始授戶部主事戶部
為金穀劇曹而公所督太倉粟時尚有中貴人監之
公不兢不絀委曲調停無撓法焉復奉命出理徐州
倉項之以望調吏部為太宰汪公鉉所器重故任吏

部者率矜崖岸高自標致扃門謝賓客雖親故人不
相接以示尊公顧數與諸友游以詩文相賡和暇則
浮白對奕談笑竟日而無廢事卒之人莫敢干以私
而稱吏部能謝絕請謁亦卒無踰公者公既負才氣
居銓衡要路素伉直不善事權貴人而諸僥倖見抑
者又日媒孽之時柄臣銜公不附已遣邏卒廉公陰
事久之無所得終不釋公至是蓋已遷太常矣會九
廟災公例上疏自陳竟中以他事令公歸歸時年才
四十耳居六歲而配張宜人又卒六歲而太宜人卒
公哀毀彌甚每哭輒撫棺號曰天乎乃不令母見開

先舉子耶蓋遲遲者越八年始葬焉公故嘗病脾間
歲作不至劇丁卯秋乃大作踰年竟不起距生於弘
治壬戌八月二十八日凡六十有八歲公少博學彊
記有大志所與交皆當世知名士以意氣相許遇事
籌畫剖析多出人意表往先皇帝幸承天嘗命少
傅翟公巡九邊云翟公議自遼東始業已行矣公獨
請間謂曰公國家重臣也主上所倚任京師密邇
邊塞藩籬單弱虜颺迅可至今車駕在江漢公柰何
復遠去京師令緩急不相及乎公往宜自宣大此聲
實相副萬全之畫也翟公矍然悔失計拊手謝曰老

詩不任事微君幸教幾失之卒改行如公策公之慷慨知大計皆此類也嗚呼以彼其才假令秉筦鑰之寄所建豎必且掀揭可觀乃于方壯之年竟一蹶不復起雖致位卿貳稍稱通顯矣然實未究厥施也昔人論馮唐李廣有不逢時之嘆乃先皇帝長馭遠攬臣下一言稱旨即不次待以卿相可謂有時而公卒擯棄不偶以死此又何說也比先皇帝上賓公聞之蹕蹕幾絕意若無復有知己者公之情見矣公目罷歸稍益克拓舊學與荆川唐公念菴羅公約爲天台鴈蕩之遊值喪其內子不果行既而嘆曰會心

處不必在遠吾直巖居而川觀耳乃闢亭館招致四方賓客時時以其抑鬱不平之狀發之于詩尤好爲金元樂府不經思索頃刻千餘言酒酣與諸賓客倚歌相和怡然樂也以是公之長篇短調徧海內而名亦隨之人或以靡曼謂公者公不顧嗚呼古賢智之士抱琬琰而就煨塵者或傍山而吟或被髮而嘯或鹿裘帶索而歌要之其中皆有所負而未庸故緣此以自洩而世以恒度測之遠矣若公者毋亦有所負而欲洩也歟良可悲已所著有閒居集十二卷雜集二十一種行于世

提督四夷館太常少卿煎南京國子司業訥

周公怡墓志銘

姜寶

公諱怡字順之號都峯後改號訥谿世為宣州太平人高祖端慶祖德夫祖全皆不仕父本秀號西疇西疇公初以公考推官滿贈如公官繼因穆皇帝登極覃恩以公南太常少卿貴加贈中憲大夫母劉封太孺人又加贈太恭人公少遊邑庠中嘉靖甲午鄉試登戊戌進士初授推官司理順德以治行第一人徵選吏科給事中言事忤旨杖闕下仍建繫錦衣衛詔獄時嘉靖癸卯六月二十七日也歷甲辰乙巳凡

三年 上用箕降神之言乃與前此言事同建繫侍
 御富平楊公爵貞外郎泰和劉公魁並得釋未彌月
 而 上為箕神造臺太宰熊公浹極言不可然忘其
 請釋三公也 上於是怒罷熊公為民而復逮三公
 焉歷丙午丁未凡兩年而 內殿災 上親於火光
 中聞半空有神語令釋三公於是三公者竟釋云公
 歸猶得送母劉太孺人終自是家居凡十九年歲丁
 卯肅皇帝賓天 遺詔還公吏科尋轉太常少卿未
 及任改而北既任太常也又以言事忤旨外補山東
 按察僉事戊辰轉南京國子監司業己巳復轉太常

少卿提督四夷館事未及行而疾作度不可行也托
 友人操江都御史吳公時來上疏以請疏為少師石
 鹿李公所力阻不果上竟卒於家時隆慶二年十月
 十七日也公自諸生時即能有異獲不避溝壑不忘
 之志郡倅古冲李公督學介菴章公大司成白山倫
 公方舉業相知已奇公器識非尋常矣及為順德司
 理書臯陶祥刑之戒時自觀省旁郡邑皆以神明稱
 其署府篆也適 章聖太后國喪 肅皇帝南巡省
 視 陵寢之日 駕往來境上諸供應取諸倉卒公
 一以身應之無不立辦也既而倅官從舟南行當有

協辦於他郡時則守既至視事矣卒未能辦公代爲
辦其事亦無不井井於是撫按其地者皆荐公卓異
才天曹授公吏科猶以資望當擢銓司適南畿員數
克溢不獲留爲恨居掖垣朞月而封事凡八九上如
謂巡撫論不肖不及方面文臣論郡守不及見任舉
令丞自矛盾舉境內人才濫及貪邪爲失體謂計部
本兵及司空三大臣皆不職宜亟罷謂文選考功二
司宜得人而又其任謂贈謚予奪失當出相嵩調旨
爲專恣而欺罔元旦日食昧爽前不及三分免收護
也謂少虧不如無虧收護可免修省不可無種種皆

確論最後大臣不和懷人黨比言官罷謫大敵在前
而文武構釁皆非國之福爲三可懼輔臣竊威福吏
部輕黜陟督撫辱將官而將官懷小忿誤大事爲四
當戒蓋指相鑿嵩冢宰瓚總督翟鵬趙廷瑞總兵張
鳳周尚文而意專在嵩謂嵩威靈氣焰陵轍百司中
外不畏 陛下而惟畏嵩尤人所不敢言嵩故多中
黨激 上怒摘䟽中日事禱祀語爲訕謗於是被廷
杖前後繫詔獄四五年志愈壯既起廢官奉常猶䟽
陳五事以仰答 新天子之知遇一曰定君志二曰
畏天命三曰敬大臣四曰擇左右五曰勤朝政時近

習用事之人以方導。上宴遊公所言妨已也。由此亦遂忤旨調外矣。公既名高海內，且自中朝清貴，出宜薄外僚，不屑事事也。然在山東最肯留心職業，暇則與僚友義河李公幼滋、潁泉鄒公善時講授。湖南聞者興起，蓋東郡因公在此，幾還鄒魯之風焉。其司業南雍也，真能以身爲師，而寶適承乏祭酒，深愧糠粃在前，故自予以及六館師生無不者。祭事公者，後轉奉常，當去爭欲請留而不能，人以比唐陽公。城然又謂陽公稍似激，而公德器渾全實過之。蓋公學聖賢之學，非但節槩過人如陽公而已也。嘗遡公問學淵源，所自其蚤歲師事東廓鄒公龍谿王公，以二公皆陽明先生高弟，弟子欲因以窺先生之蘊奧，而得其傳，既於傳習等錄皆口誦而身體矣，然而公之心未已也。於是又旁求曲取，上自宰執下至山林布衣，遠而數千里外，近在鄉井間，凡有道望可印證學術者，每往來辨難要歸於一，是而不喜爲高而無實之談，故惟公之學能會知行於一條，非窺言者比也。性甚孝，居西疇，公之喪及葬而廬於墓，能盡哀以復古禮。奉母劉太孺人尤善，夙願始論事必跪而得請，乃可。獄中以書寄慰，皆曲盡人子之情。與二弟忤，恪居

垂老猶不忍分爨念族誼恐離散置祭田以展墓而合食斛山晴川二公卒數千里吊哭於其家時輩傾已者顧其人才可用猶薦之當道無幾微芥帶於胸中比垂歿口授子若翁遺囑猶謂生平以訐爲直傷忤甚多戒子孫勿干有司祠鄉賢真所謂得正而斃焉者歟公生弘治乙丑十二月年六十有四所著有奏疏若干卷集若干卷並梓行

太常寺少卿傅公林墓志銘

呂本

公諱佩字朝鳴虛巖其別號也上世本汴人至宋從高宗南遷遂占籍仁和高祖十二公曾祖得祥悖信好義邑令旌其閭祖諱延定父諱祺號實齋母姚氏生二丈夫子公其季也姚孕公及期實齋公夢冠蓋貴人造門寤而生公公生甫三歲而實齋公棄世母鞠育訓課之童年即有志遠到經史皆通涉大義顧數以病廢及冠始克專力於學補邑庠弟子員嘉靖乙酉舉于鄉至乙未余閱其卷學博而識高大奇之因薦列峻等同事者亦皆歎賞不置以爲真濟世才

也既而見其豐願修髯以然出群輩及與論國家利害生民休戚莫不了然胸中余心竊喜爲朝廷得人當是時公聲名籍籍傳播士林不特余一人知之而已未幾選授興化知縣公至爬垢剔蠹日夜皇皇求蠲民瘼其甚者軍竈奪民之田地而不稅不役民負累逃亡過半至困死無愬司軍竈者又深庇之而視民如讎前令不敢詰詰輒爲所構往往罷去公曰若是何以令爲吾奉天子命爲民父母民在倒懸而解安能覩頽在位哉乃極言宿弊疏上於朝者三必行而後已雖沮撓百計至有擐甲以攻者公陳練持議益力卒還軍竈所攘奪於民者民乃甦田賦悉平適余以使事過淮聞頌聲嘖嘖滿道路因折簡寄之曰公可謂不負余之知矣民肖公像立祠于邑公又以餘力修治學宮日群士子講說周公孔子以相磨礪疏濬河流縈繞迴合如玉帶以啟卿相之兆公在興化三年百姓知公之心以爲恩上官知公之政以爲績天下士大夫知公之才以爲譽於是天子知之召爲兵科給事中公亦知無不言言無不盡而所以報朝廷者不遺餘力矣世廟幸承天公以才望扈從有武定侯郭勛恬寵驕恣不法無人臣禮

回鑿之日即抗疏劾之忤旨奪職公聞命欣然就道
歸數年郊廟禮成得還章服公夙稟正直平生無脂
膏媿姍態又素有經濟天下志地方諸所利弊有可
以裨民生益國計者遇事侃侃論辨不少假聽者無
不捧手起敬以是觀風使者咸謂公宜大用前後薦
剡凡十四上竟不用 穆宗新即位廣開言路蒐羅
海內名士時巡撫趙公玉泉首薦公以應又以例當
引年僅晉秩太常寺少卿致仕向使不久處山林壯
志宏議獲竟厥施其濟世安民奚難嗟夫昔人謂士
果能自爲材耶公天性孝 及事寡母色養兼至與仲
兄 公能首相聚朝夕怡怡母及兄病嘗割胸股
肉和藥以進病隨愈敦睦宗黨婚喪患難咸力佐其
費如煮粥以活饑民施衣以庇啼寒施飲以濟道渴
種種善事皆彰彰在人耳目其濟世之意於此亦可
槩見云

太常寺丞張來儀傳

實錄

張羽字來儀後以字行更字附鳳本潯陽人刺史戩
之後元季俶擾徙家湖州領鄉薦授安定書院山長
再徙於吳洪武四年以儒士徵至京應對不稱 旨
放還再徵爲太常司丞俄坐事謫居嶺南未半道召
還自沉於龍江驛前羽博學好古文章精潔有法尤
長於叙事詩亦清麗作畫師小米所著有靜居集

太常寺寺丞金陵杜公環傳

黃佐

杜環字叔循金陵人其先本廬陵人侍父一元遊宦江東遂家焉一元好交四方名士多哀其詞翰以教環以是環博經史長於翰墨其書法端妍至於行草亦各臻妙歲丙午太學初建環以儒士薦被除學錄以其書法示六館之士皆倣而式之尋入侍春坊大為皇太子所眷時天下以工書名者皆被徵而至然流輩中罕見其比焉故環之書名騰京師學士大夫有所述作借其書以取重洪武改元遷太常贊禮部後為晉王府錄事終太常寺丞為人謹飭重然

諾好周人急父友兵部主事常允恭死於九江其母張氏年六十餘哭九江城下無所歸有識允恭者憐其老告之曰安慶守譚敬先非允恭友乎盍往依之毋如其言附舟詣譚譚謝不納母大困念允恭嘗仕金陵親戚交友或有存者庶萬一可冀復哀泣隨人至金陵因訪一元家所在道上人對以一元已死惟于環存其家直鷺州坊中門外有雙橘可辨識母服破衣兩行至環家環方對客坐見母大驚頗若嘗見其面者因問曰母非常夫人乎何爲而至於此母泣告以故環亦泣扶就坐拜之復呼妻子出拜妻馬氏

解衣更母濕衣奉糜食母抱衾寢母母問其平生所親厚故人及幼子伯章環知故無在者又不知伯章存亡姑慰之曰天方雨雨止爲母訪之苟無人事母環雖貧獨不能奉母乎且環父與允恭交好如兄弟今母貧困不歸他人而歸環家此二父導之也願毋無他思時兵後歲飢民骨肉不相保母見環家貧雨止堅欲出問他故人環令媵女從其行至無所遇而近坐乃定環購布帛令妻爲製衣衾自環以下皆以母事之母性褊急少不愜意輒詬怒環私戒家人順其所爲勿以困故輕慢與較母有痰疾環親爲烹藥

進匕飭以母故不敢大聲語越十年環以贊禮郎奉
詔祠會稽還道嘉興逢其子伯章泣謂之曰太夫人
在環家日夜念少子成疾不可不早往見伯章若無
所聞第曰吾亦知之但道遠不能至耳環歸半歲伯
章來是日環初度母見少子相持大哭環家人以為
不祥止之環曰此人情也何不祥之有既而伯章見
母老恐不能行竟給以他事辭去不復顧環奉母彌
謹然母愈念伯 疾頓加後三年遂卒將死舉手向
環曰吾累杜君 累杜君願杜君子孫咸如杜君言
終而絕環殯而 之歲時常祭其墓學 士宋濂為環傳其事云

太常寺寺丞贈太常寺少卿柳庄袁璜墓志銘

姚廣孝

永樂八年歲在庚寅十二月五日承直郎太常寺丞
柳庄袁先生卒于家訃至京明年辛卯正月二十二
日其子中書舍人忠徹奏聞 上為之哀悼賜鈔六
百錠營葬事遺中官祭于其家二十四日忠徹傳奉
敕旨命臣廣孝撰先生墓志 臣謹奉命按吏部員外
郎 臣陳宗問行狀先生諱璜字廷玉姓袁氏系出南
昌世多聞人宋南渡有諱子誠者知臨安府兼大宗
正司丞扈蹕至鄞遂家焉其孫鏞以進士死忠於德

祐間曾祖諱景安登進士第祖諱衍隱德弗耀考士元文林郎翰林國史檢閱官傳學能文器量恢廓性明果義有所不可則奮力正之故鄉閭以忠直稱初衍無子以弟澤民承後澤民仲子士元謂弟無繼兄之義白於有司奉澤民歸宗而已爲衍子俾得倫序不紊自號菊村先生實德祐忠臣之嫡孫也生子四人曰瑛曰珪曰瑛曰璟瑛即先生也先生性剛毅直方不泛交於人安貧養志當勝國之季勵精儒業九流百氏之書靡不涉究然時與願違遂游歷湖海間遇異僧古崖於補陀洛伽山一見而奇之因授以相

人訣期先生後必以術顯先生決人貴賤壽夭禍福休咎如指諸掌凡求占者必先察其心志聽其語言次觀其形氣然後斷以吉凶規以忠義雖達官貴人遇之不以禮則拂袖而去聖朝啟運天下和平先生乃歸鄞城之西聿新其先業所居前後皆樹以柳扁曰柳莊鄉之人皆稱爲柳莊先生洪武間上在潛邸聞先生名遣使以幣禮聘焉先生即拜受即沐浴戒行李而起及見上大悅先生於是肅恭而前凝神佇思俯仰左右一日而盡得矣先生再拜稽首而言曰聖上太平天子也龍形鳳姿天廣地闊重瞳

龍髯二肘若肉印之狀龍行虎步聲如洪鍾實乃蒼
生真主也但年交四十鬚長過臍即登寶位時上
雖聽其說而未全信居無何先生辭還故里錫賚殊
厚洪武三十五年壬午六月十七日 上嗣登大寶
萬幾之暇因感先生昔言之驗若左右券於是敕遣
內侍驛召至京拜太常寺丞授承直郎待以特禮賜
冠服鞍馬文綺鈔錠及居第在京以便其老 上巡
狩北方己丑冬十月尋有旨召至行在先生即日就
道東殿特念其衰老非霜露所堪於是賜貂裘安車
而敦遣焉既入覲獎諭有加已而得請展省先塋復

敕驛置歸其鄉及先生卒 上賜鈔營葬事遣中官
祭於其家復敕臣撰墓志先生卒時年七十有六先
生平日篤于孝友親疾革則焚香籲天減已之年以
益親壽疾果差人以為孝感所致暨失怙恃哀毀過
禮先生時厄於貧窶衣食棺廓為之必竭其力由是
禮無不脩宗族之貧乏者恒嗇已用以賑之弟妹之
孤嫠者咸推恩以撫之有嫁娶之不能者出財力以
相成之先生與鄉黨也正而不群妻子也嚴而有禮
交朋舊也以信義而不阿邱患難也救之惟恐不及
人有以役當徙而委之金百鎰不相聞者餘十年及

其歸以金還之封識如故友人以事逮于歿者莫之能贖先生收厝以歸其母先生臨利害一以理勝略無顧忌趨避其忠義正大如此先生好爲歌詩與客燕飲酒酣擊缶仰天豪吟人以爲康節先生也先生知命之終屬續之日怡然如常溘爾而去故鄉間父老及所交游者罔不悲嘆公卿大夫士走哭奠祭者踵相接于道平生剛方中正學純行端綽有古君子之風於是 皇上見知特加禮遇豈惟其技術之精妙而致然爾昔袁天罡父子事唐太宗名著方策以爲希世之有今觀先生與其子忠徹際遇 聖天子始終恩寵莫大之榮顯豈天罡父子可能跋及者哉先生平日相人之奇驗九靈山人戴良傳脩詳茲不復繫

袁太常珙相術之妙在勝國時已擅天下洪武初姚少師廣孝爲緇流寓嵩山寺珙一見即以匡輔器期之曰公劉秉忠之儔也後廣孝以高僧選入燕邸預密謀言珙於 王王亦素聞其人乃託以珙名隸尺籍遣旗勾取既至未即得見陰命選衛士長身多髯貌與王類者九人王雜其中俱微服適市拉珙入酒肆飲 王位列第三珙遽前引其裾俯伏呼殿下衆

晒其妄珙言愈切 王即起還宮召珙入見珙曰殿
下千里召臣而於酒肆相見乎問何以識對曰殿下

入肆時手操弓矢臣望見知之皮皺而瘦龍掌無肉

也 世所傳辨宰相於嵩山佛寺
識真主於長安酒家者即此 更使詳視因極道天

表之盛曰年交四十髯長過臍當登大寶必爲二十

年太平天子王悅由此遂決大計珙留燕城未久遇

列校散卒多以公侯大臣官許之語徃徃流播 王

恐有他虞因遣還鄉其後渡江登極驛召至京拜太

常丞賜與甚厚及議建儲 上意有所屬遲回累年

使珙相 仁宗曰後代人主又相 宣宗曰萬年天

子於是國本始定他日見 仁宗於東宮問曰吾壽

得幾何曰過七七之年天福無疆及乙巳鼎成竟如

此數云子忠徹亦傳其術官至尚寶卿

南京太常寺卿徐初傳

以下南京

實錄

南京太常寺卿徐初字復陽浙江會稽縣人永樂中
由舉人授山東濰縣教諭秩滿擢戶科給事中洪熙
元年陳治道十事皆見嘉納賜金織文綺陞都給事
中宣德間陞大理寺卿中官姓阮者守遼東失利侍
郎柴車按其當死者三十餘人初奏當誅首惡勿濫
及非辜工部侍郎羅汝敬巡撫陝西坐事出官遇赦
吏部輒復其官言官劾以爲黨罪應死初曰是特失
覆奏耳吏部因得釋初爲寺丞楊復論事不合被劾
俱下獄 宣廟特宥之正統初調南京太常寺卿尋

致仕景泰三年七月卒于家初爲人孝友寬平出言未嘗忤人至於論事決疑侃侃形於色及卒朝野惜之

南京太常寺卿愧齋陳先生音神道碑 倪岳

弘治甲寅六月二十有六日南京太常寺卿莆田陳先生以疾卒于長安西街之第先生諱音字師召姓陳氏別號愧齋世家閩莆之涵江宋明州觀察使淬與子仲剛俱死靖康之難旌其里居曰忠孝坊則涵江之祖也曾大父宗義大父光遠父崇澄號耕樂俱有隱操以先生貴初贈耕樂翰林編修進南京太常少卿妣黃氏亦自孺人進恭人先生生而敦朴嗜學少長補郡庠生有文名牟都憲俸時僉閩臬一見竒之遣諸子從之游舉天順壬午鄉薦登甲申進士第

入翰林爲庶吉士成化乙酉簡授編修丁亥預修
英廟實錄成賜白金文綺進祿一階壬辰乞歸省墓
賜寶鑑爲道里費丙申滿九載陞侍講入侍經筵辛
丑同考禮部會試癸卯擢南京太常寺少卿弘治己
酉南京翰林學士員缺命兼掌院事壬子滿九載始
進今官僅越二載遂得疾以卒先生天性孝友痛二
親不逮祿養每忌日悲泣不自勝仲弟祖理家政爲
輸粟給遷授以冠帶季弟員事舉業親爲指授遂領
鄉薦叔母居孀力爲贍給遺孤子女爲之婚嫁族里
之貧者周恤恐後平生和易坦率與人交誠意懇切
或與論事知莫可如何率曰也罷人遂以此稱之弗
校也至其操履則剛介堅定不爲勢利屈在翰林時
西廠初建方用事其爪牙常英者乘之鼓扇密捕兵
部主事楊仕偉于家并箠掠其妻事叵測人皆閉門
避之先生與之隣即登墉大呼曰汝何人斯非奉
上命敢擅辱朝臣耶其人詰之曰汝爲誰而言乃若
是復抗聲曰我翰林侍講陳某也懼汝輩壞國法禍
福非所憚其人爲之少戢在太常時守倫中貴究理
樂器歲久損失益多欲歸咎先生然實無預也同事
者亦密喻俾少俯就先生與之抗禮益辯論不顧其

人怒甚遂併劾于朝所司覆覈卒無所及盖仁者之
勇其不可奪率類此居官詳慎於義所當爲不遺餘
力爲編修䟽上時政十事皆切治體時論趨之及任
卿佐於凡祀享薦獻必躬爲閱視務竭誠敬舉用僚
屬一秉至公人不敢干以私先生素明經學四方之
士爭欲出門下京邸至不能容經其指授往往取高
第嘗有一登其門兩魁多士者則先生造就人才可
知矣今太常齊卿章春坊王諭德鏊皆顯名者其他
布列中外尤多所作詩文肆筆而成畧不構思南京
士夫公卿之家凡有慶弔之禮必藉一言爲重委幣
而請者無虛日焉先生始入官余忝同升得朝夕聚
處談經論史未嘗少間至相約遞爲主以會歲規之
資切磋之益親芝蘭而醉醇酎者久矣及官於南書
問往來不絕嘗遣幼弟從之游教愛深篤盖先生之
處友久而益敬忠信篤厚非他人所能及而今不可
見矣每緇閱篋笥見其遺墨爲之愴然嗚呼惜哉先
生以正統丙辰三月十有七日生春秋五十有九

興化府志

音爲人和易坦率細事無可不可至分別義利則界
限截然在翰林時嘗上䟽陳時政數事剴宜不阿權

璫黃賜有母喪省寺院監成赴弔翰林亦有倡議欲行者音奮曰堂堂翰林相率而拜內監之門奈天下笑何議遂止大學士劉吉起復音移書止之其後當路有缺吏部欲擬音吉日陳某腐儒也不可其爲少卿滿九載乃進卿音問學深博爲古文肆筆而成率平實有理致遺藁累十卷弟員鄉薦常州府通判子舉鄉薦華正德戊辰進士孫湏樂鄉薦歷和平知縣性謹愿凝重故友某貧甚求佐湏樂索篋中屢空乃以一銀酒尊應之不令內人知其隱德足尚矣湏孝蔭叙歷承天通判

南京太常寺卿呂憲傳

實錄

呂憲字秉之翰林學士贈禮部左侍郎謚文懿原之子也以蔭錄爲國子生成化初又以東宮恩授中書舍人仍上疏乞應試遂薦京闈中書舍人之得應試也實自憲始秩滿遷禮部員外郎郎中擢南京太僕寺少卿改通政丙辰擢太常寺卿正德丁卯始致仕閱四年卒詔葬祭如制憲爲人坦易喜讀書作詩又習聞典故文與行能世其家

呂憲字秉之浙江嘉興府嘉興縣人父原爲內閣翰林學士贈禮部右侍郎謚文懿憲有異質書過日成

誦未成童精故訓尤善度時事多曲中文懿竒之既
文懿卒 英廟念輔導功推蔭補國子生成化丁亥
授中書舍人猶刻志文學居常手不釋卷謂詩必經
指授乃中矩則時黃巖謝方石詩有盛名遂就學謝
稱其所就非時輩所及爲文章務學左傳史記唐宋
諸大家弗屑也或時獨坐朗誦史漢中警語首肯沉
思客至若弗聞或戲其志太高曰取法乎上斯得其
中顧不以階身科目爲恨曰先公所期待我者詎止
是哉乃疏乞應試報可言者劾其非例 憲宗特允
之有朕念呂憲儒臣子孫有志科目之論遂中順天

辛卯鄉試時中書員多雜進獨與石淙楊公一清相
友善兵部事有與中書當會行者恃柄臣勢不復關
白同楊論之得旨悉仍其舊秩滿遷王客員外郎石
淙曰子攻文墨吏事非所習盍慎諸憲曰歐陽子文
章不少夷陵之閱牘曹司故有部案皆吾師也已而
能聲勃勃起公卿間進本司郎中琉球國乞歲一入
貢謂子之事父定省不可間其意實利於賈市以自
便耳廷議難之而患無辭憲請折之云若知父子之
禮當從父命衆服其言西夷回回奏乞取廣東道歸
國朝廷將從之憲執不可曰西域貢有常道更之恐

有他釁且經涉江海萬餘里勞費將不貲途寢其奏
丙午以薦擢南京太僕寺少卿建白處置操備馬匹
免徵苜蓿種子諸四事以公務之京師又上言立誠
信習禮樂尊前王表英靈凡十有二事多見采行故
事太僕馬數不得爲人所窺文卷例不刷浸以磨滅
登耗無所於考憲曰他官不相涉是也太僕所掌何
事而可不與知乎乃建白凡馬政卷許太僕官二年
一照刷以爲例弘治中改南通政進太常寺卿祀事
多更張卷牘浩穰至或相牴牾又采輯累朝沿革爲
條例若干卷事至按而行之至今賴以無誤正德丁
卯致仕大學士楊一清稱其志存澤物而久官閒散
不克自展布其政事終爲文學所掩云

南京太常寺卿矯亭方公鵬生壙志

方鵬自撰

先生姓方氏名鵬字時舉矯亭其所自號遠祖萬二
元海運提領仲子富代之洪武中官錄其產謫戍于
邊富兄德又以析居不與其難德又生榮榮生文貴
鵬之曾祖也祖槐庭府君諱盛始業儒教授鄉里以
高年懿德膺冠服與鄉飲父節菴府君諱麟例授福
寧州幕賓贈承德郎禮部主事詳見太宗伯顧公鼎
臣新建伯王公守仁所爲志表母封太安人公以成
化庚寅三月二十二日生崑山南新瀆里長以明經

補縣學生領弘治辛酉鄉薦第二名不赴會試開門
士徒自遠方來者彌衆正德戊辰與母弟鳳同舉進
授高等任南京禮部主事丁外艱服闋改南京刑部
陸員外郎郎中丁內艱服闋改南京職方道聞逆藩
之變兼程赴難適車駕南巡脩嘗辛苦調南京文選
所至頗舉其職言官交薦陞浙江布政司左叅議疏
辭不允歲餘又以言官薦陞山西按察司副使提調
學政與部使者語不合意即棄官而歸累疏得允致
仕自是屏跡田野放情丘壑嘉靖丁亥又廷臣撫臣
薦召爲右春坊右庶子兼翰林院修撰仍階四品克

經筵講官主考順天府鄉試復克廷試掌卷官編纂
御劄同修會典陞南京太常寺卿三疏得准養疾未
幾有忌我者非例削去新銜終身不錄忌我者罷臺
諫薦劾交上而先生病且老不可用矣所著矯亭存
稿責備餘談續觀感錄紀元要覽行於世崑山人物
志名臣節錄藏於家先生受氣甚薄操心素危力不
足以任勞學不足以阿世故主者怒之以爲慢法而
不武滯而不化悒鬱而不舒故達者病之以爲拘平
生無他玩好惟耽嗜經史殆忘寢食故逸者憫之以
爲癖赴人緩急若拯溺焚或其人以怨報德亦不中

止日用不給未嘗輕以干人人或告乏則傾囊而與之弗吝故智者笑之以爲愚晚嬰疾痛杜門謝客不入城府而躬慶弔故責備者罪之以爲簡其爲人如此不足以當名筆之銘謹自述履歷如右他日納之壙之中足矣葬某年月日則虛以俟

南京太常寺卿牛公鳳墓志銘

張璠

公諱鳳字道徵別號西唐先世上黨人避元亂宗人散居河南高祖諱大占籍于葉遂爲葉人大生廣曠生貴貴生麟世有隱德麟生鐸公考也始起家爲陝西隴城巡檢後以公貴封吏部驗封郎中公生而端凝恂慈驗封公愛之長隨任乃邊方寡文學士公志向學顧無書凡購得諸家盡讀之了其大義後任滿還歲大侵乃僑居南陽驗封公謂公曰吾以薄宦歸汝能力學成名吾無憾矣公由是刻厲入學爲諸上驗封公卒家益落公依季父和以居雖窘甚志不少

襄乃正德庚午舉于鄉辛未登進士第時冢宰遠菴
楊公考選諸進士爲給事中獨竒公卷留授驗封主
事滿考陞驗封員外郎郎中時沐國公薨其子景欲
自滇襲爵當路者爲請公曰沐氏世爲守臣自
宗朝皆陞見請襲并謝今若是與海外諸國何異卒
從公議時錢寧用事嘗挾勢囑索吏人冀得吏代後
厚賂公哂然錦衣金吾要官顧爲羣小囑耶竟不與
部中事無纖鉅必執例以行冢宰晉溪王公稱公爲
執法吏 武皇帝南巡公率僚衆抗疏諫詔杖之廷
濱死 今上登極錄言者功陞公俸從四品己卯轉

考功郎中公悉心采覈不爲毀亂真冢宰白巖翁公
一日出一帖云茲實鑽刺得官者公視之曰諸君不
能盡知中二人皆九年考滿陞級非速化者喬公大
駭怒投帖者因命公詳覈之留者太半愈益重公久
之陞南京太僕寺少卿尋調太僕寺少卿奉勅督畿
內馬政公振頽修墜馬政大舉陞南京太常寺卿公
益寅清飭修祀事神樂觀隸太常故事錢穀俱免覈
公召知觀語之曰 祖宗優若曹甚厚予故不檢括
顧可諉不知乎乃粗爲立法歲積羨米四百石復命
量給觀中老弱投閑者人人感悅己丑夏會奉天門

鷓鴣吟災詔兩
其奏乃
公公
以居
日有詩惟興所至而止平生少病一
若悶暈狀家人驚掖已不能言端坐而逝享年
有五配任氏歸公時室懸磬僅備釜爨宜人躬薪水
績紡以佐日用子若女雖孩提言色不少假嘗曰凡
不肖子皆毋厯不父聞致終失教耳及公貴俸入漸
豐惟儉勤如故封宜人先公卒

南京太常寺卿贈禮部右侍郎謚文簡穆公

暉墓志銘

王道

嘉靖己亥八月南京太常寺卿玄菴穆公以疾終於

家計聞士林驚嘆 上悼念經幄儒臣詔贈禮部右

侍郎謚文簡遣官諭祭善營葬事蓋備數也公諱孔

暉字伯潛自號玄菴山東堂邑人曾大夫弘潞州訓

導妣南氏大父彪朴菴處士妣任氏父清耆儒妣任

氏繼黃氏公既貴馳恩初封父徵仕郎翰林院檢討

贈妣孺人繼贈大父父皆通議大夫南京太常寺卿

祖妣妣皆淑人公少穎悟凝重未成童即文章奇古

爲識者所器年十八遭母任淑人憂哀毀嘔血以善
喪聞弘治甲子舉山東鄉試第一乙丑登進士第被
簡爲庶吉士讀書中秘丁卯授翰林院檢討己巳預
修孝廟實錄成忤逆瑾意調南京禮部主事瑾誅
還舊職辛未同考禮部會試壬申遷南京國子監司
業癸酉以外艱歸服闋改北監司業尋丁繼母黃憂
服闋改翰林侍講克經筵講官嘉靖紀元壬午主順
天鄉試乙酉預修武廟實錄成陞左春坊左庶子
兼翰林院侍講學士修武官續黃丙戌主考武舉公
凡三執文柄皆號得人試錄出識者輒指其浮于理

者曰此玄菴筆也已而果然是歲入直便殿日講
既以經術侍謂足以行也因摠所得發爲講義簡明
剴切寓誠規諫聞者皆悚敬焉未幾進掌院事兼撰
文官誥勅首遵聖諭崇雅革浮遂定爲一代詞命
之體庚寅冬十有二月上於文華殿奉安先聖先
師神位因諭講臣人各陳經書大旨一章冀以不負
所望於是公獨取孟子卒章發其見知聞知之奧以
祇若聖天子纂承群聖之志篇末獻言指切時弊
則所謂啟沃交修之實目前緊要之事以仰副聖
明之望者也大略謂用人者不肯體聖心布公道

使私求者易進直道者難容由是內外大小臣工罔不改操趨時道化未洽皆由于此故欲用人之得其當在聽言之致其審偏聽則蔽兼聽則明以一人愛憎之口爲人才邪正之據此用舍之際或有未究於理者矣奏入聞者聽之明年春某月日公已赴闕候講以陰雨免朝隨衆而回俄聞上御文華殿亟馳以趨已不及矣即上章自劾明日得旨改南京尚寶司卿舉朝駭愕給事中葉洪上言穆某聖代淳儒留之左右必足以裨益聖德不報公惟循省自咎無幾徵見于顏面壬辰轉南太僕少卿癸巳遷南太常

寺卿公德望隆重善類推先自爲學士至官太常凡十擬侍郎皆不果用然益昭輿論之有在矣甲午夏以疾自陳得致仕歸公自是杜門靜養與世相忘而望實益彰薦剡交上朝野顯顯莫其復起不幸天不憖遺奄忽至此嗚呼悲夫公資稟既純問學尤邃初留意古文詞已嘗闖其奧矣既知其無益棄不復爲乃篤志正學研窮義理體之身心其所造卓然處可與儒先君子同不謬於聖人而公不自以爲足也嘗謂古之人窮理盡性以至於命今於性命之原習其讀而未始自得之也顧謂有見安知非汨慮於俗思

也邪於是抉去藩蔽力肆恢弘經訓之外雖世儒所斥以爲異端如佛老者悉取其書精擇而詳說之以與吾聖人合曰性中固無是分別相也久之洞見道原通達爲一嘗論心學之要曰鑑照妍媸而妍媸不著於鑑心應事物而事物不著於心自來自去隨應隨寂如鳥過空空體弗碍觀此則公所得信乎玄矣故其見之行也無事矯飾而中正純懿自中禮則孝友之實取重鄉評忠信之德孚於朝著在南雄時父封君適患風疾公左右醫藥食寢俱廢及卒柴毀骨立殆不勝喪後喪繼母亦如之有弟八人相繼天逝

公哀悼之久而不置子其孤遺皆至成立宗鄰媼之媼睦周至不以貧格恩教人每薰以和人一親之故及門之士多所成就立朝雖久而位不稱德未究厥施然志操雅正字量深沉當事變揮霍波瀾反覆之際人多不能自持公處其間超然無預確乎不移泊如也同時縉紳無問趨向同異咸宗仰之以爲不可及知德者至擬諸程伯子云晚年病脾不能食者數月而神志益清文思煥發皆寫其自得之妙有塵垢斯世遨遊太清之意其於死生去來蓋亦翛然庶幾孔子所謂聞道者矣公所著述有讀易錄尚書困學

前漢通紀諸史通編遊藝集各若干卷其大學千慮
玄菴晚稿則病筆也生成化巳亥正月十六日享年
六十有一

南靡志

黃佐

穆孔暉字伯潛山東堂邑人少端慤寡言博覽經史
有深湛之思弘治甲子有 詔用洪武舊制以京職
兼主各藩試事主事王守仁校文山東置孔暉舉首
時論稱得人焉乙丑連取進士改翰林庶吉士除授
檢討每玩索有得輒輯成編同館崔銑見之嘆曰橫
渠妙契疾書今復見矣正德巳巳逆瑾用事惡翰林

儒臣不附巳因纂修後以擴克政務爲名調南京禮

部主事庚午召復檢討同考辛未會試所得多知名

之士壬申陞本監司業既至以身率諸生惟令靜默

窮究義理毋瑣瑣口耳記誦中人以上類多從之癸

酉改北監罹艱歸然後被教之徒思模範如孔暉不

易得也服闋改翰林侍講在經筵進講經書多所規

諫嘉靖壬午主考順天鄉試簡拔尤精尋歷春坊庶

子兼侍講學士太常寺卿仍兼學士卒贈禮部右侍

郎謙文簡孔暉天性好學雖王守仁所取士未嘗宗

其說而非薄宋儒晚年乃篤信之深造禪學頃宗臨

沒作偈有到此方爲了事人之句論者以此窺公所
詣云所作詩文精確不苟在南監時宅中多竹吟諷
有得輒題其上後郭維藩爲司業南行贈之以詩有
句云書聲山下月詩思竹邊秋崔銑謂玄菴一聯摸
寫臻妙境矣每舉以爲詩家三昧云玄菴蓋孔暉別
號也

南京太常寺少卿鄭雍言傳

實錄

南京太常寺少卿鄭雍言浙江鄞縣人由進士爲翰
林院庶吉士與修性理大全書成授中書舍人轉行
人司副 仁宗監國南京時每被命作詩文遣詞無
滯 仁宗喜之且謂其楷字端嚴類其爲人宣德間
命於內府教內使書尋陞河南按察司僉事仍留內
府供事 上初即位始遣就職秩滿陞太常寺少卿
雍言性謙謹與物無忤文思豐贍尤工篆書日應四
方之求無吝色景泰元年五月卒

南京太常寺少卿夏瑄傳

實錄

夏瑄字韞華湖廣湘陰縣人贈太師謚忠靖原吉之子年十三以父蔭爲尚寶司丞後以母老乞就養改南京尚寶司天順戊寅陞少卿秩滿陞南京太常寺少卿仍掌司事成化十七年二月卒年六十四計聞賜以祭瑄少頗豪放喜議論亦頗能屬文大臣蔭叙子能問學者惟瑄及楊士奇子導知名子崇文舉進士爲南京吏部郎中

南京太常寺少卿鄭環傳

實錄

鄭環字瑤夫浙江仁和縣人天順庚辰進士及第授翰林院編修預修英廟實錄書成遷修撰修續資治通鑑綱目轉司經局洗馬未幾擢南京太常寺少卿至是以三年考滿入朝卒于旅寓時成化十八年四月賜以祭如例環性方介自守有所不爲爲文不尚華藻所至與人多不合其在太常察案頗不堪之然無他腸人亦不深咎云

南京太常寺少卿劉公稱行狀

公諱稱字務教系出漢長沙定王發次子安成思侯禮之後號荆山劉氏由荆山析居永新之藥湖由藥湖徙城北公之曾祖諱元杰贈工部右侍郎兼翰林院學士妣歐氏贈淑人祖諱髦以易魁鄉闈隱德教授學者稱石潭先生封翰林院編修妣楊氏贈淑人留氏封太淑人考諱定之歷仕正統成化間以禮部左侍郎兼翰林院學士入內閣典機務卒贈禮部尚書謚文安妣賀氏張氏贈封俱淑人公賀淑人出也兄弟八人於行居三成化八年以任子恩例授中書

舍人進階徵仕郎爲中書十年陞大理寺副食其俸
仍掌中書科事又四年陞南京尚寶司丞弘治八年
丁繼母張淑人憂服除陞南京尚寶司卿進階奉政
大夫正德四年逆瑾竊權罷歸田里明年瑾敗詔起
用公復補任如南京公是年以病告特授中順大夫
太常寺少卿致仕歸數月而卒正德九年十月十
二日也年六十有三公天資純朴習聞祖父之訓而
謹守之歷官四十年寅畏小心始終一節以是無憾
於公議中書命曰盡心所職勤慎可嘉尚寶命曰才
識優長性資謹厚皆其聲實足副云方逆瑾欲去不

附已者易以他人使恩皆出其私門有以賂得免
超遷美官者或以諷公公曰吾豈可以辱吾先聲故
公之遭廢而復起也人皆榮之家居昧爽詣祠堂焚
香展拜即就張淑人寢所省候起居屬有疾疫家人
多出避獨供湯藥不離左右及其喪之日哀毀如禮
與實生已無異四時家祭一遵成規行之遇忌辰尤
悲不自勝接人謙厚質直一出於性然不爲矯飾以
徇時俗其言語訥然若不出口至論先朝古典古今
人物出處則各有條緒媿不倦五任皆職清務省公
暇坐靜室閱載籍以自廣吟詠極有典則作字雖倉

卒不爲行草其別號曰拙菴晚年更號歸田叟石潭
文安二先生學行著天下天下樂道景慕盖有願爲
執鞭而不可得者及接公之容儀而聽其言說則莫
不起敬以爲前輩之風韻猶可想見於斯也公可謂
能世其家者矣

太常寺少卿夏公良勝墓志銘

歐陽鐸

南城夏氏相傳出真州制置使貴之後君名良勝少
穎異漸漬家學又經鄉先生圭峯指授爲文辭警拔
不群丁卯虛齋蔡公視學至建得卷竒之拆視乃君
訝日子異日爲良臣無以勝矣改名曰良勝而字之
曰于中是歲舉江西鄉試第一人明年第進士觀政
工部尋丁繼母王憂又明年丁父愚夫公喪壬申起
復至吏部議補科道鄉人適操司事有言宜用贄候
之君不可予因贊其決投牒二日補刑部主事君略
無悔也日與諸曹講求法比公暇與予七人者爲文

字會癸酉調吏部文選司主事一切饋遺無所受非其人雖求一見不可得甲戌同考會試乙亥轉稽勳員外郎丁繼母程憂程事愚夫公僅兩月遺命屬君尤切君以故特慟素不悅者造作口語謂匿喪俟陞其傷德亦甚矣服除以原職召補考功司庚辰彬賊蠱惑先帝南巡中外詢詢君與進賢萬汝信連署論之下詔獄拷掠毒至不死矯旨廷笞之垂死矣卒以不死類有護持者云落職歸家設講授生徒創祠增置祭田始作家譜推分業以居諸姪郡大夫聘修郡志始月成稱有史法令上即位還諸言者君乃

補考功員外郎人材賢不肖地方險易事興革所宜莫不廣詢備記太宰白巖喬公才之特奏補文選郎中君惟公惟清於資格外時有超遷莫不厭人心裁抑僥倖士風爲一振陞南京太常寺少卿未行爲嶮人所詆亦會當道什憾降知茶陵州三年政成有漢吏風俸薪悉入公帑時疑其矯君曰良勝待罪臣也此寧足贖耶戊子詔發爲民明年讎摘議禮稿以聞逮至繫臺獄三年謫戍遼陽三萬衛遼士從者數十人時作爲歌詩殊有自得語丙申十月病脾越二月望後一日卒後二日詔至不及聞悲夫距所生成

化庚子十一月二十六日年五十有七

南京太常寺少卿黃公重墓志

黃

國家必有慎憲炳幾之臣獻納匡拯而後中外賴以
又安正德之季忠賢滿朝若吾廣毅齋黃公其人
公諱重字子任南海人正德戊辰進士授行人羅外
艱歸服闋復職壬申使伊瀋葬祭事竣卻其金帛
鞍馬行至懷慶遣人馳投復卻之筮任之初行已蓋
嚼如也癸酉使遼東勞夷人却鎮巡例贈如使伊時
甲戌以績最擢戶科給事中巡視內十庫光祿寺宿
弊俱革乃建言重名器久任用慎薦舉省權課四事
戶部奏從所省商旅稱便已而清理畿內倉場權貴

避焉丁丑復以績最獲賜恩父母時左都御史彭澤坐夷情削籍公奏請寬宥以昭往功輿論趨之尋進兵科右給事中考選京衛武官淑慝罔弗當者會教皇帝北巡迎駕有勞賜金幣數事遂疏乞歸省復賜寶鏹行庚辰復任尋罹內艱歸癸未服闋補吏科右給事中市魁李陽鳳挾中官勢恣爲奸利方付刑部俄改錦衣獄尚書林俊執奏不聽乃疏慎政令以固治安會災異修省復疏 詔令不常爵賞太濫聽言不弘營建不節言甚剴切聞者危之甲申夏進兵科左給事中太監潘真出鎮荆湖違例丐請公封駁不

避秋以言禮杖于 午門外尋進戶科都給事中賜金幣寶鏹丙戌克武舉考官丁亥畿內饑疏請賑濟詔行其言多賴全活入侍經筵擢南京太常寺少卿先是三擬進秩皆不報久乃獲遷此蒞事養牲厨役人受其惠已丑星變以自陳致仕忌者快之公論惜焉時同年呂柟謫金陵嘗書喬岳大川氣象青天白日襟懷以贈歸構草堂刻柟書以自况云公平居和易諧謔然嫉惡向義則勇奮不顧有姊適魯氏而貧每損貲贖還其產業同僚張漢卿落職貧甚瀕行傾囊贖焉鄉之漁民有官責其逋課垂死者見即爲之

代償潘伯通等十人誣陷盜獄爲白其寃皆得釋他如革橫刷之舟築捍澇之牐鄉人頌德輒自遜謝其行誼類此巡撫錢如京疏請起用而公已卒嘉靖己亥七月年六十有二訃聞上遣官特賜諭祭

南京太常寺少卿汪公佃行狀

公諱佃字有之姓汪氏系出徽州越國公華之後子孫自徽徙江西之貴溪再徙弋陽世爲弋陽人曾祖諱志福領永樂庚子鄉薦官岷府教授祖諱仲端累贈禮部左侍郎考諱鳳貴州布政司左叅政贈禮部左侍郎妣祝氏封淑人生五子長俱工部郎中次佑不仕次俊禮部尚書次偉吏部左侍郎公其季也初父兄懼門戶太盛爲公擇今名曰留少子力畊自給耳公顧奮曰兄輩能讀書進取我獨不能乎以易領弘治戊午鄉薦屬叅政公邁疾而諸兄宦遊公日侍

湯藥不離側暨遭考妣喪先後殯葬如禮用是久滯然益得肆力於學正德丁丑領南宮薦廷試賜進士出身第一選爲翰林院庶吉士己卯授編修階文林郎庚辰同考會試所取多名士乙酉以纂修實錄成陞侍讀丙戌克經筵講官敷陳啟沃多所稱旨有白金文綺之賜是歲復同考會試秋奉勅校書闈中尋爲要人所沮不果行自是假考選翰林謀擠公去矣初擬陞四川叅政遂庵楊公曰朝廷日親經筵方欲求賢汪侍讀賢者也豈可使外補乎擠者顧益甚十月復入講尚書皇極敷言公依蔡傳衍義不明言君臣一倫蓋君道在皇極中已擠者因密奏云汪佃講書無君臣倫蓋譏訕也且佃乃前禮部尚書俊吏部侍郎偉之弟云如擬落職通判丁國府擠者陽以好相送且窺公見公談笑如平日諸兒誦聲不絕不覺自失有悔言在宣州閉門省過不與民事上下默受其庇諸生暨屬吏之子從游講學者三百餘人彌年咸克然有得宣俗尚巫覡喪葬多非禮自公之講學也務以孝弟禮義爲教俗漸移易已量移松江府同知同知職清戎公行其所無事戎清而民不擾治瀕江常患水寇公下令通水處各爲門時其啟閉

盜不得恣睢公久淹郡邑宦情已微至是聞詹宜人疾篤遂拂衣去有部使者銜公因劾公擅離職未報而南京宗人府經歷之命下矣公曰吾歸及與老妻訣足矣因繳還經歷告身家食待罪辛卯被劾事白有旨復職時宗伯公尚存公不忍離雅有終焉之志已未臺諫舉天下遺贖數十百人而起用者僅十許人公與焉丙申春北上道改南京禮部主客司郎中尋出爲建寧道按察僉事在閩三年政不苛而事集部使數薦之建有髡而俠者小民逋負輒致之桎梏善禁官司無能誰何公立寘之法斥散徒從毀其廬

舍百姓莫不稱快公嘗薦得浦豪黃姓者惡其郡縣不能捕公使人謂曰汝無久竄誠畏死第出我痛懲以觀其後可也已而自縛至公懲誠而遣之其人遂率化富人張某爲賊所殺賊不得或疑其姪利所有二賊之公薦究無狀讖之部使而建守受反間必欲搆之死地部使復下公議公曰殺不辜以媚人我不忍爲也後部使代至卒如公議戊戌發礦事起公當產礦地躬入山谷勞瘁特甚自是病矣嘗建皇華樓閔敞雉堞爲一方巨觀功成而民不知費公自爲記云又修建寧府志武夷山志人物志刻史漢異同李

建州集皆行於時己亥冬以考績過家明年春陞南京尚寶司卿秋七月陞南京太常寺少卿公素患痰火至是日就尪弱會災異策免大臣公即自陳求去旨不允十一月復具疏乞休命未及下而公已卒于金陵寓舍時嘉靖十九年庚子十二月距生成化甲午十一月年六十有七公天性峭直議論英發無諱忌若與人寡合然其中實坦蕩雖以此遭擯斥淪落而賢士大夫推其鯁介亦以此爲兒時即能以禮自防不爲利疚自鄉薦至蓋棺四十餘年公門無私言遇有枉者輒公言之教授公嘗遺田四十畝號生員田資諸孫以勸學自叅政公入邑庠享之而公兄弟箕裘不墜因世業焉嘗與兩兄議讓還而伯氏卒竟如議捐爲義田與族人共之其清修退讓行于家者類如此文章平正明暢得歐公典刑有集若干卷自號東麓主人學者稱東麓先生云

南京太常寺少卿麟洲王公世懋墓志銘

王錫爵

嗚呼此故太常少卿王公之墓也公名世懋字敬美
父大司馬嘗命之曰吾聞東海有鳳麟洲爾庶幾埒
而兄乎置其讀書之室曰麟洲已而慕王君公之行
別置號曰墻東生宦小達思自挹損更署曰損齋然
而學者稱麟洲先生如故王之先自即丘子覽而下
世有聞人至五季而有諱仁鎬者爲吳越王鎮海節
度衙推官嚴之分水曾孫縉爲宋左司諫六傳至夢
聲爲崑山州學正即其官家焉崑山後割隸太倉州

遂爲太倉州人祖倬歷官至南京兵部尚書爲弘治
正德間名臣父仔歷官至南京都察院右都御史總
督薊遼軍務贈兵部尚書爲嘉靖名臣妣郁太恭人
公少慧有英氣應對機警鋒出甫十齡而病瘵大司
馬憐之不欲強以咕嗶乃公顧益苦私習爲文章其
師愧歎以不如自解去以補國子生中戊午順天鄉
試已未舉會試 賜同進士出身肄事兵部嘗是時
公父大司馬在薊遼虜方深入而相嚴欲以是中之
逮下獄公與兄鳳洲公欲上書請代而大司馬聞而
止之曰 上怒方熾是沃之膏也毋速我死遂不果

上明年庚申大司馬竟不免公兄弟扶喪歸廬
側朝夕哀奠啜粥茹素太恭人憐其瘠而手和肉羹
舁之弗食也比三年除服猶被白衿單衣不敢與宴
會聽音樂惟於詩酒夙所嗜以自陶寫而已時鳳洲
公業爲海內詞宗而其同社友李于鱗汪伯玉諸公
皆有盛名當世公最後出與倡酬諸公輒大驚賞呼
之小美會 莊皇帝登極公兄弟於是伏 闕上書
辯大司馬冤久而乃白又會南省臺以公兄弟薦太
宰固欲俱起之公乃奉太恭人命謁吏部選中途而
報除南京禮部儀制司主事南曹事簡公得以其暇

肆力於文文益工居無何以郎中叅病攝曹事而魏國公之事起魏公者老而無嫡子其長子邦瑞弗愛愛嬖姬鄭之子邦寧會夫人薨夤緣請於上以鄭繼封且謀爲邦寧奪長地會有旨悉按錄諸勲胄當襲者入國子習禮魏公猝急畏公議遂以邦瑞應時少宰林濂領部喜而謂公中山王之德遠矣能庇其後人不違禮而諸爲徐氏居間者大失望乃給祭酒姜公曰邦瑞強年矣而始不稱胄子者何以邦寧故也且邦寧不爲嫡而何以母拜天子誥稱夫人姜公疑未決而返之儀曹儀曹復返之魏國魏國乃

以二子俱請林公甚恨之然無以難也公乃移書都督幕曰鄭夫人固妾也其應封與否非所敢論弟邦寧之生在未封前則均庶也而邦瑞爲長何兩請之有林公大喜卒從公後邦瑞卒爲嗣魏國鑄祿諸居間者絀祭酒亦坐誑誤罷而後以無賄白都人至今稱王儀曹不醜法也居歲餘遷北儀曹員外郎檢緝宗牒詳謹無害會以太恭人病請告歸至池河聞計以不及待疾哭數絕而甦癸酉服除補祠曹尋遷尚寶丞會傳劉二御史上疏言事觸江陵大相怒下獄公與大理卿石公爲傳治裝爲劉營救以是失大相

命弔祭秦藩遷江西參議治南康公惴惴
懼不免乃精心訊牒勤職業而御史因挾與俱之九
江饒州時分巡者未至一切以委公公未嘗習爲及
其治之輒精於是御史以爲材而異之尋入賀 萬
壽還遷其省副使理驛傳驛傳在江右最繁官其地
者顧毀譽不能有所損而會時政裁抑冒濫則又奉
行過當至學官有徒步出入者公爲令下諸郡縣表
其平上之臺臺著爲令已縮司篆及署分巡道當省
會至繁猥公于吏事益習有所剗割曲當理情即老
吏莫敢措手尋監秋試冬入計南昌令者以進士任
可五載矣始用小苛辦得上官意屢登薦書以是益
驕橫直凌司府莫敢誰何公盡發其奸而去之時藩
司之從事者新不能有所悉亦一以屬公當省臺大
會方岳覈二千石及黃綬以下噤自瘖公獨條對侃
侃太宰嘆曰才難不其然乎今者睹練事敢言獨吾
省藩長與江右臬耳大相故知公材聞太宰語欲收
之會公感疾上書乞骸骨大相寢不奏而山東學使
者缺太宰以風公公力辭歸聞化女事而慕之以書
自通無何別去公嘗決一父子訟而父辟甚公痛杖
其子且誨之已乃命杖其父其子匍匐前護請代始

釋之父子感悔如初有袁帥者好偵諸曹得其事嘆曰三代不啻是矣移視陝西學政強就行其所條約束明暢藻雅甲他省諸生欣得師無何而有給事中某御史某故習余與大相忤乃上疏指摘化女事謂余與鳳洲公講張爲幻而留省應之至波及公業已報聞弗竟矣而公慨然謂身爲人師率即事弗竟何顏復臨諸生乃移文兩臺乞骸骨而余第家馭亦自河南謝學政俱歸久之大相卒太宰第諸道學使此兩人俱上考尋起公督浙江學政辭不赴甲申冬復起督福建學政鳳洲公謂公可以出矣余處子又處

乃偃蹇

天子之命而傷地下心于是公勉而之

任時大試期迫八閩故材數一邑待試無慮萬人而其鄉薦紳所在雲集意皆有所望公一切謝却之專心閱卷甫三月畢事所升汰皆服人進其省左叅政分守福興道入賀萬壽於道報遷今官居金陵雖甚適少事特不勝士大夫筆硯之請戶履如錯遺余書讀古人生我名者殺我身之句意色愀然然而無以絕也性喜山水且欲盡遊諸名勝補昔遊所未足緒成家言而公業以勞損成病火灼于喉寢食爲減乃移狀於脚沈爲具疏請下吏部極稱公賢姑予

告治病病痊有司奏起用如六卿例報可遂歸里第
明年四月手書析產遺戒多理身齊家要語檢理身
後事喪禮爲儉令宅人積日計之弗及也曰吾自今
端坐以俟期而已屬歲大侵餓莩盈道公乃倡諸大
姓行糴粥全活可萬計死者浮屠法濟之沾沾喜曰
吾胸中更無事矣然尚矻矻著述有澹思子墜崖內
外篇經子臆解其課子姓爲諸生較藝不怠而性稍
卞善恚將百日病復大作二日而粒絕又二日辰興
命移席中堂強起坐飲少水亭午呼楮墨手書一紙
與鳳洲公訣大槩謂種種諸證俱現恐在旦夕弟此

敏有膽決加以學力定力遂能輕死破恋六親既以
無情即見兄如不見也未復謂天下雖存饑 聖主
能蠲賑事尚可爲惟願 廟堂勿固寵勿近小人勿
聽人言搜人過諸君勿偏見勿立黨勿思報復即死
無憾既緘書未發迫瞑自力起使人掖而據胡床盥
手與足既畢諸子問有言否曰四月書已盡之復何
言不昏散否曰無念何所昏散翛然遂逝公以嘉靖
丙申生歿于萬曆戊子春秋五十有三耳平生孝友
重名義其施予稍裁而能不失居恒不輕爲公府居
間間有之必宗戚之困阨不平者若州里之利弊不

能控者嗜義若渴有所聞汲汲行之遠識長慮悠然
能見事後少亦微有耳目之好觸一語立斷遣之居
官好爲條教煩不至瑣尤能曲暢物情因事爲功好
提獎屬吏即不至曠濫未嘗不弘揜覆以故多感之
少而通易晚視學收旁通諸經皆能叢其大要亦喜
讀二氏書恒謂吾于兩廡饗亡所貪苟陰用其實而
陽詆其名或假竊其似而自文其陋者俱耻之以故
望崖編諸書要皆其中精至語識者謂不下白香山
晁文元也其詩文繼鳳洲公而起世以比宋之二蘇
所著詩文集共得五十餘卷其閩部三郡圖說窺天

外乘二酉委談學圃雜疏前已行人間

能見事後少亦微有耳目之好觸一語立斷遣之居
官好爲條教煩不至瑣尤能曲暢物情因事爲功好
提獎屬吏即不至曠濫未嘗不弘揜覆以故多感之
少而通易晚視學收旁通諸經皆能最其大要亦喜
讀二氏書恒謂吾于兩廡饗亡所貪苟陰用其實而
陽詆其名或假竊其似而自文其陋者俱耻之以故
望崖編諸書要皆其中精至語識者謂不下白香山
晁文元也其詩文繼鳳洲公而起世以比宋之二蘇
所著詩文集共得五十餘卷其閩部三郡圖說窺天

外乘二酉委談學圃雜疏前已行人間



